



BUKWASHO BWA KUFUMA MWIULU

Bebitanchika kwi
ba Watson Goodman

Kya bupetu — Kechi kya kupota ne

BUKWASHO BWA KUFUMA MWIULU

Mu kano kabuku katelwa'mba BUKWASHO BWA KUFUMA MWIULU twashikula ne kutanchika-tanchika Binembelo monka mwayila ene mambo o twasaka kulumbulula, o betufunjisha mu Buku wa Lesa. Nalanguluka namba byambo bine biji mu Buku wa Lesa byakonsha kwitulumbulwila mwa kwibitwala ano mafunjisho, ko kumvwa'mba Buku wa Lesa mwine wakonsha kulumbulula bintu bijimo.

Byambo bya Lesa byafuma mwiulu, kabiji i byo byo bikwasha boba baji na nzala ne kilaka bya kusakisha bololoke. Muntu umvwe walapila, ne kuvundamina ku bubi bwanji, umvwe wamulomba Nkambo amba atwele mu muchima wanji, ne kwipana ne muchima wanji yense kwi Nkambo Yesu Kilishitu, amba ekale ke Mupulushi wami, Nkambo mwine ukemweshwa kwi aye, ne kumupa lusekelo lwanji ne mutende wanji. Ami mwine naubile byonkabyo mu mwaka wa 1937, kabiji kufuma ku kyokya kimye kufika ne luno, kechi naleka kwenda na Nkambo mu luno lumvwañano lwa kukumya ne. Amiwa nemusashijila namba umvwe kechi mwipana kala ne, ipanal kwi aye LELO JINO ekale ke Mupulushi wenu ne Nkambo yenu. —Amiwa ne Watson Goodman (1920-2002)

BUTEMWE BWA LESA

1

Yoano 3:16

Mambo Lesa byo ebatemwisha ba pano pa ntanda, wapaine Mwananji yenkawa umo, amba, bonse bamwitabilá kechi bonaike ne, poso amba bekale na bumi bwa myaka.

Yoano 13:1

Kabiji kijilo kya Lupitailo byo kyaji ke pepitu kufika, Yesu byo ayukile'mba, kimye kyami kya-fika kya kufuma pano pa ntanda ne kuya kwi Batata, byo atemenwe ba kwanji baji pano pa ntanda, aye wibatemenwe ne ku mpelo.

Yelemiya 31:3

Yehoba wamwekele kwi abo kasa bakiji kwalepá, ne kwamba'mba: Amiwa nemutemwa na butemwe bwa myaka ne myaka; onkao mambo natwajijila na kwimubila lusa.

Lumwekesho 1:5

Kabiji bifúma ne kwi Yesu Kishitu, kamonyi wa kishinka, mu-beji wa bakafumá mu bafu, ye mwine mfumu wa bamfumu ba pano pa ntanda. Kwi aye witute-mwá, ne kwitukasulula ku mambo etu na mashi anji.

2 BULESA BWA YESU KILISHITU

Yoano 1:1 ne 14

Mu ntendekelo mwajinga ao Mambo, ne ao Mambo ajinga na Lesa, ne ao Mambo ajinga Lesa ... Kabiji ao Mambo aalukile ke muntu, ne kwikala waikajilenga muno mwetu (kabiji twamwene lukumo lwanji, lukumo nobe lwa awa mwana umo yenka wafumá kwi Shanji), kasa ayula bupe ne bukine.

1 Timoti 3:16

Kabiji kyaitabilwatu amba, kyafyamiká kya mu kunemeka Lesa kwetu kyo kikatampe: Aye wamwekele mu bumuntu, walumbulwilwe mu Mupashi, bamumwene ku bamalaika, wasapwi-

jilwe mu mikoka ya bantu, wai-tabilwe pano pa ntanda, kabiji watambwilwe mwiulu mu lukumo.

Yoano 14:9,10

Kumvwa Yesu wamwambile'mba: Nabanda nenu byonkabi, ne anweba Filipa, ne kungyuka nenyi? Awa wammoná amiwa wamona ne Batata; ne anweba mwaamba byepi amba: Tubulai Bashenu? Kechi mwaitaba byo nji mwi Batata, ne Batata byo baji mwi amiwa nenyi? Byambo byo nemwambila kechi nebyamba bunke bwami ne: pakuba nanchi Batata bekála mwi amiwa bo bo-ba mingilo yabo.

Mateo 17:5

Byo akyambilenga, ponkapo, jikumbi jibembéla jibazhikile: kabiji ponkapo, jiwi ja mu jikumbi jaambile mba: Uno ye Mwanami, ye natemwa, mo namwena lusekelo; mumvwai aye.

1 Yoano 4:15

Bonse baitabá'mba: Yesu ye Mwana Lesa, Lesa waikala mwi abo ne abo nabo mwi Lesa.

Luka 1:35

Kumvwa malaika'mba: Mupashi Wazhilá ukeya pe obewa, ne bulume bwa Mwine Wakilá bukakunyeñamina: onkao mambo awa mwana ukasemekwa ukatelwa'mba: Wazhila, Mwana Lesa.

Mateo 3:17

Kabiji ponkapo ne jiwi jafumi-ne mwiulu amba: Uno ye mwanami, ye natemwa, mo namwena lusekelo.

Kolose 2:9

Mambo mwi aye, mo mwaikala kuyula konse kwa buLesa monka mu mubiji.

Isaya 9:6

Mambo kwitusemenwa mwana, twapewa mwana wa mulume; kabiji bundamakyalo bukekala pe aye, ne jizhina janji bejitela'mba: Upána mana Wa kukumya, Lesa wa bulume bonse, Shabantu wa myaka, Mfumu wa mutende.

Yoana 8:58

Kumvwa Yesu wibambijile'mba: Kine, kine, nemwambila namba, Abalahama byo ajinga ukyangye, amiwa kasa njipo.

Yoano 13:13

Anweba muntela amiwa amba: Mufunjishi, kabiji'mba: Nkambo: mwaamba bulongo; mambo byo byo nji.

Yoano 6:35

Kumvwa Yesu wibambile'mba: Amiwa ne kajo ka bumi; aye wiya kwi amiwa kechi akomvwe nzala nangwa pacheche ne, kabiji ne awa wangitabilá amiwa kechi akomvwe kilaka nangwa myaka yonsetu ne.

Yoano 10:7

Kepo Yesu wibambijile jibiji amba: Kine, kine, nemwambila namba: Amiwa yami kibelo kya mikoko.

Yoano 11:25

Kumvwa Yesu wamwambijile'mba: Amiwa yami lusanguko ne bumi: awa wangitabilá amiwa, nangwa afwe, ukamona bumi.

Yoano 8:23

Kumvwa aye wibambijile'mba: Anweba mwi ba panshi; amiwa ne wa kwiulu: anweba mwi ba pano pa ntanda; amiwa kechi ne wa pano pa ntanda ne.

BIMO BYAKUKUMYA BYO AUBILE YESU 5

Mateo 20:30 ne 34

Kabiji ponkapo, bampofu babiji baikajile ku jishinda, pa kumvwa'mba, Yesu ubenakupita, babijikile'mba: Nkambo, betubile lusa, anweba mwana Davida. . . Kabiji Yesu, byo aubile lusa, wibakwachile pa meso abo; kabiji ponkapotu ke balabe, ne kumulondela ke bamulondele.

Mateo 14:19-21

Kabiji wakambizhe mabumba amba: Ikalai pa nsono; pa kushikula bashinkwa batanu ne masabi abiji, watajile mwiulu, ne kwibapesha, katebaule bashinkwa ne kupana ku bana banji ba bwanga, ne bana banji ba bwanga na-

bo ke bapane ku mabumba. Ne bonsetu bajile, ne kwikuta baikuchile: kabiji batolawile bibese byayile na kushalapo byabo jikumi na bibiji byayulá. Kabiji ababajilé bajinga kampe biumbi bitanu bya banabalume bya kubula kutelelako banabakazhi ne bana.

Luka 5:4-6

Kabiji pa kupwisha kwiambila mabumba, waambile Shimona'mba: Shinjikai, muye kwazhiká, mute makonde enu, mwipaye. Kumvwa Shimona amba: Nkambo! twajikukabakanangatu bufuku bonse ne kamo kafwamo ne. Byonkabyo mambo a jivi jenu,

makonde nsakwiata. Byo baubiletu byobyobyo mwafwile bisamba

6 YESU KILISHITU YE MULENGA WA BYONSE, KABIJI YE MFUMU

Loma 14:9

Mambo na onka ano mambo Kilishitu wafwile ne kusanguka ke mumi jibiji, amba ekale Nkambo wa bafu ne bomi.

Yoano 1:3

Byonse byalengelwe kwi aye; kabiji mu byonse byalengelwé ka paji kyalengelwe nangwa kimo kwa kubula aye ne.

Byubilo 2:36

Onkao mambo bonse ba mu nzubo ya Isalela bayukishetu amba, Lesa wamupa buNkambo

bikatampe bya masabi; ne makonde abo ayilenga na kuchibaika.

ne buKilishitu, yenka uno Yesu ye mwaipayile ku musalabu.

1 Kolinda 1:9

Lesya ye wa kishinka, kabiji monka mwi aye mo mwaichilwe mu lumvwañano Iwa Mwananji Yesu Kilishitu Nkambo yetu.

Bahebelu 1:2

Pakuba kuno ku mpelo ya ano moba aye witwambila atweba mu Mwananji, ye atongwele'mba, ekale nswanyi wa byonse, kabiji mo mwi aye mo alengele byonse.

YESU KILISHITU YE UKACHIBILA MAMBO 7 A BANTU BONSE

Mateo 25:32

Kabiji mikoka yonse ya bantu ba pano pa ntanda ikakunguluki-
la ko aji: ne aye ukebabanya umo
ku mukwabo, umo ku mukwabo,
byonka byo abanya kafunga mi-
koko ne bambuzhi.

Byubilo 10:42

Kabiji ye witulayile'mba, mu-
kebasapwile bantu, ne kunshimu-
na'mba, ye mwine ye atongola
Les'a'mba akekale wa kwibachi-
bila mambo bomi ne bafu.

Loma 2:16

Mu joja juba jo akebachibila-
mo bantu byafyamiká byabo aye

Les'a konka kwi Yesu Kilishitu,
monka mwayila mambo ami
awamá.

2 Timoti 4:1

Nakukambizha ku meso a Le-
sa, ne ku meso a Kilishitu Yesu,
ye ukebachibila mambo bomi ne
bafu, ne na mambo a kwiya kwa-
nji, ne na mambo a bufumu bwa-
nji.

Loma 14:10

Kabiji obewa, i kika kyo uzha-
chisha mulongo wobe? kabiji na-
ngwa i kika kyo usujila mulongo
wobe? pakuba atweba bonse tu-
kemana ku kipona kya kije kya
Les'a.

8 YESU KILISHITU YE YENKA WITUKULA

Luka 19:10

Mambo Mwana muntu waiya mu kwibakeba ne kwibapulusha balubilamo.

Yoano 10:9

Amiwa yami kibelo; inge muntu atwelele pe amiwa, ukapuluka, kabiji ukatwelanga ne kulupuka, kasa amona bya kuja.

Yoano 14:6

Kumywa Yesu wamwambile'mba: Amiwa ne jishinda, ne bukine, ne bumi: ka paji wíya kwi Batata ne, poso pe amiwa.

Yoano 8:24

Onkao mambo najikwimwambila namba: Mukafwa mu mambo enu: pakuba inge mwabula

kungitabila amiwa amba, i ye, mukafwa mu mambo enu.

Bahebelu 7:25

Onkao mambo aye wakonsha kwibapulusha kya kine kine abo bafwénya kwipi kwi Lesa mwi aye, byo aikala myaka ne myaka mu kwibalombela.

Bahebelu 5:9

Kabiji byo alumbulwilwe, waa-lukile ke mwine wa lupulukilo lwa myaka ku bonse bamukokéla.

Byubilo 4:12

Kabiji lupulukilo kechi luji mu mukwabo nangwa umo ne: pakuba kechi paji jizhina jikwabo muno munshi, japewá mu bantu, jo twafwainwa kupulukilamo ne.

YESU KILISHITU YE YENKA WITUKULA 9

Titusa 2:14

Ye wipaine mwine pe atweba, etukule ku bubi bonse, ne kwitokeshesha aye mwine bantu ba kwikala ke banji mwine, ba mukoyo mu kwingila mingilo yawama.

Lumwekesho 5:9

Kabiji baimba lwimbo mupya, amba: Anweba yenu mwafwainwa kutambula buku, ne kushinkula tutetesho tujipo: mambo anweba mwaipayilwe, kabiji mwamupotejile Lesa na mashi enu bantu ba mu bisaka byonse, ne ba mu njimi yonse, ne ba mu mitundu yonse, ne ba mu mikoka yonse.

1 Kolinda 1:30

Mambo aye ye wimwikazha monka mwi Kilishitu Yesu, ye aalulwile Lesa amba ekale ke mana etu, ne bololoke bwetu, ne kuzhijikwa kwetu, ne bukuzhi bwetu.

Kolose 1:12-14

Kasa musanta kwi aye Tata, ye witwalwile ku tuji bafwainwa kutambulako bya mu buswanyi bwa bazhijikwa bwa mu kyeya; ye witupokolwele mu lusa lwa mfishi, ne kwitutumulwila mu bufumu bwa Mwananji ye atemwisha; mwi aye mo mo twamwena bukuzhi bwetu, lo lulekele lwa mambo etu.

Loma 5:9

Mambo pano, byo twabingishiwa na mashi anji, kine kabiji tukapulukila mwi aye ku bukaji bwa Lesa.

1 Yoano 1:7

Pakuba umvwe twenda mu kyeya, pamo byonka byo aji mu kyeya aye mwine, twaikala na lumvwañano lumo, atwe bene na bene, ne mashi a Yesu Mwananji etutokesha ku bundengamambo bonse.

1 Petelo 1:18, 19

Byo mwayuka'mba, Mwakuji-lwe ku bwikalo bwenu buncha bo mwatambwile ku bashakulu benu, kechi na bintu bibola pamo ne si-

liva ne ngolode ne, poso na mashi anemá, nobe a mwana mukoko wabulá bulema nangwa kiko kicheche ne, o mashi a Kilishitu.

Efisesa 1:7

Mwi aye mo mují bukuzhi bwetu bwa mu mashi anji, lo lulekelo lwa mizhilulwila yetu, monka mwayilá bunonshi bwa bupe bwanji.

Bahebelu 9:14

Nanchi mashi a Kilishitu, yenka wilambwile mwine kwi Lesa mu Mupashi wa myaka, kasa abula bulema, kechi akakijishemo kwimutokesha michima yenu ku mingilo ifu amba, mumwingijile Lesa mumi, nenyi?

LUKETEKELO LWA MWI KILISHITU LO LWITUPULUSHA

11

Yoano 6:28, 29

Kepo bamwambile'mba: Tube byepi, namba twingile mingilo ya Lesa? Kumywa Yesu wibambile'mba: Uno ye mwingilo wa Lesa, amba mumwitabile aye yenka ye atuma.

Loma 5:1

Onkao mambo byo twabingshiwa ku lwitabilo, tuji na mute-nde ne mwine Lesa monka mwi Nkambo yetu Yesu Kilishitu.

Efisesa 2:8, 9

Mambo ko ku bupe ko mwapulukila monka mu lwitabilo; kabiji kechi kyo kintu kyafumá kwi

anwe bene ne, kyo kya kupanatu aye Lesa; kechi kya mu mingilo ne, kuchina'mba muntu nangwa umo waketota.

Yoano 20:31

Pakuba bino byanembwa'mba, mwitabile'mba, Yesu ye Kilishitu, Mwana Lesa: kabiji amba, pa kwitabila, mwikale na bumi mu jizhina janji.

1 Yoano 5:4

Mambo bonse basemwá kwi Lesa bashinda pano pa ntanda; kabiji lushinjilo lwashindá pano pa ntanda, lo lwitabilo lwetu.

Masalamo 103:17

Pakuba lusa lwa Yehoba lo lwa ku kala konse ne lwa pe ne pe pa boba bamwakamwá, ne bololoke bwanji bufika ne ku banakanununa.

Majilo 3:22, 23

Twabula konaika mambo a butemwe bwa Yehoba bubúla kupwa, mambo kechi wikileka kwitubilako lusa ne. Lukelo, pa juba pa juba, bya lusa lwanji bikelwa kumweka; bukishinka bwenu bo bukatampe.

Titusa 3:5

Aye witupulwishe, kechi na mambo a mingilo ya bololoke yo twaubile atwe bene ne, poso mo-

nka mwayilá lusa lwanji, monka mu kovwa kwa kusemwa jibiji, ne kusangulwa kupya kwa Mupashi Wazhilá.

Mika 7:18

Kwepi kuji lesa mukwabo wae-sakaná ne anweba, mwibalekélako bantu mambo abo, ne kuleka mizhilulwila ya boba bashalapo ba mu buswanyi bwenu, mubúla kuzhingila mwaka mwaka, mambo mwatemwa kuba lusa?

Masalamo 103:11

Mambo jiulu byo jiji kwale-
peshá na ntanda, byo biji ne bu-
kata bwa lusa lwanji kwi boba
bamwakamwá.

LESA WITWITA AMBA MWIYE KO NJI 13

Mateo 11:28

Iyai ko nji, anweba bonse basulwíla na mingilo ne kunemena, ne amiwa nkemukokolosha.

Isaya 55:1

Umwai, anweba bonse múmvwa kilaka, iyai kuno kují mema; ne yewa wabulá mali naye, eye atambule kajo, aje! Iyai, mutambule binyu ne mukaka bya kubula kupanako mali, bya bupetu.

Isaya 1:18

Yehoba waamba'mba: Twayai, tumvwañane; nangwa mambo enu achilatu nge, akekala ke ato-

katu to nobe sinó; nangwa achilala nobe mashi, akekala ke pamo nobe boya bwa mukoko utoka.

Yoano 7:37

Mu juba japeleléko, jo jaji jikatampe ja kijilo, Yesu waimene ne kubijika'mba: Inge muntu waumvwa kilaka, eye kwi amiwa atome.

Lumwekesho 22:17

Ne aye Mupashi ne aye musongwa amba: Iyai. Ne aye wau-mvwá naye, ambe'mba: Iyai. Ne aye waumvwá kilaka, naye eye: ne aye wasaka naye atambule mema a bumi a bupetu.

14 BANTU BAMO KECHI BANA BA LESA NE

Yoano 1:12

Pakuba bonse mo bavujila bamutambwilé, i bo bo apele lūsa lwa kwikala ke bana ba Lesa, ke bonkaba baitabilá mu jizhina janji.

2 Kolinda 6:17, 18

Onkao mambo fumai mwi abo ne kwabana nabo, byo byamba Nkambo, ne kukwatako ku kyabipá nangwa kimo ne; ne amiwa nkemutambula, kabiji nkekala ke Shenu, ne anweba mukekala ke bana bami ba balume ne ba bakazhi, byo byamba Nkambo wa bulume bonse.

Loma 8:14, 15

Mambo bonse mo bavujila bo batangijila ku Mupashi wa Lesa, bo bana ba Lesa. Mambo kechi mwatambwile mupashi wa buzha amba mube moyo ne; kabiji mwatambwile mupashi wa bwana bwa bene, mo mo tutachila'mba: Abba, Tata.

Filipai 2:15

Namba mwikale ba kubula mambo ne ba kubula bujimuku bubi, bana ba Lesa babulá bulema, mukachi ka kisemi kyatamá ne kyaluwankaná. Monka mwi abo musamenga pamo nobe byeya pano pa ntanda.

BYAMBA LESA PA MAMBO A MALWA NE 15 BIPENDANANA BIKWABO

Byambo bya Mana 23:31,32

Kechi utale pa binyu byo bya-chila, byo bibekauka mu kato-meno, byo bipita bulongo pa mu-jibu, ne. Kabiji palutwe bisuma-na nobe mulolo, byasañana nobe kipiji.

Ngalatiya 5:19-21

Kabiji mingilo ya buntunshi yamweka, yo yo yino: bulalelale, ne bubipisho, ne bya bunya, ne kupopwela bankishi, ne bya bu-ñanga bwa lubuko, ne mafika, ne lutobo, ne bichima, ne bukaji, ne bya bongozhi, ne maabano, ne mepatulo, ne bikonkoma, ne ku-pendwa, ne kusangalala kubi, ne

bya byonkabyo; mambo a byo bino bintu nemujimuna bulongo, pamo byonka byo nemujimwine kala, namba abo boba bya byo-nkabyo kechi bakaswana bufumu bwa kwa Lesa ne.

Loma 13:13, 14

Twendenga bulongotu nobe mu mute; kechi mu kiwowo ne mu kupendwa ne, nangwa mu bya pa mwanya ne bya bunya ne, nangwa mu lutobo ne mu kichima ne. Pakuba anweba vwalai Nka-mbo Yesu Kilishitu, kechi mwi-mwene jimo nangwa mucheche mwa kubila bya lwisolwa bu-ntunshi ne.

16 KUSAKATU YESU KWA KUBULA KUMUKETEKELA KECHI KWITUPULUSHA NE

Mako 10:17-22

Kabiji byo ayilenga mu jishi-nda, kwamunyemejile umo, ne pa kumufukamina panshi, wamwipwizhe'mba: Mufunjishi wawamá, i ki ka kyo nsakuba namba, ntambule bumi bwa myaka? Kumvwa Yesu wamwambile'mba: Mambo ka mwantelala'mba: Wawamá? kafwako wawamá ne, poso yenka Lesa. Anweba mwayuka mizhilo: Kwipayañana ne, Kuba bukende ne, Kwiba ne, Kubepela mukwenu ne, Kujimbañana ne, Nemeka bashobe ne bainobe. Kumvwa aye amba: Mufunjishi, abyo byonse

nalaminenga ne ku bwanyike bwami. Ne Yesu, pa kumutala wamutemenwe, ne kumwambila'mba: Kuji kintu kimo kyo mwa-bulwa: yainga, mukapoteshe byonse byo muji nabyo, mukebape balanda, kabiji mukekala na bunonshi mwiulu; kabiji mwiye mundondele.

Mateo 22:37, 38

Kumvwa aye amba: Ukamutemwa Nkambo Lesa wobe na muchima wobe yense, ne na mweo wobe yense, ne na mana obe onse. Awo ye mukatampe, ye mukambizho mutanshi.

1 Yoano 3:7, 8

Anweba twana, kechi muleke muntu emutwale mungi ne: aye úba bololoke ye waoloká, byonka byo aoloká aye mwine: aye ule-ngalénga mambo ye wa Diabola; pakuba aye Diabola ye ulengale-nga mambo ne ku ntendekelo.

Yakoba 1:22

Kabiji mwikale ba kwioba mambo, kechi ba kwiomvwatu ne kwijimbaika anwe bene ne.

1 Kolinda 6:9, 10

Lelo kechi mwayuka nenyi amba, babulákoloka kechi bakaswana bufumu bwa Lesa ne? Kujimbaikwa ne: nangwa ba bulalelale, nangwa bapopwéla bankishi,

nangwa bankende, nangwa besámba ne banabalume bakwabo, nangwa bangivi, nangwa ba lunkumbwa, nangwa bapendwapéndwa, nangwa batukána, nangwa bajá bya lunkanankana, kechi bakaswana bufumu bwa Lesa ne.

Ngalatiya 6:3

Mambo umvwe muntu wilanguluka mwine amba, ne wafwainwá, kasa aji watu, wijimbaika mwine.

Efisesa 5:6

Kechi muleke muntu emujimbaike na byambo byatu ne: mambo na mambo a byonka bino bintu bukaji bwa Lesa bukebafikila bantu ba milengulwila.

Luka 15:32

Kabiji kyajikufwainwa kusa-ngalala ne kusekela: mambo uno nkasobe waji wafwá, kabiji lelo ke mumi; kabiji waji walubá, pano wamweka.

Loma 8:6

Mambo kuta muchima ku buntunshi lo lufu; pakuba kuta muchima ku Mupashi bo bumi ne mutende.

Loma 5:12

Byonkabyo, bundengamambo byo bwatwelele pano pa ntanda ku muntu umo, ne lufu nalo lwa-twelele na bundengamambo, kabiji byonkabyo ne lufu lwaku-

mbene ku bantu bonse, pakuba bonse balengele mambo.

Yakoba 1:15

Kabiji lwisó, nalo, pa kwimita, lusema bundengamambo: ne bundengamambo nabo, byo bwakoma, busema lufu.

Ezikyó 18:20

Awa ulénga mambo ya ukafwa. Mwana kechi amaname na mambo a bubi bwa shanji ne, nangwa shanji kechi amaname na mambo a bubi bwa mwananji ne; bololoke bwa muntu waoloká bukamunembelwa aye mwine, ne bubi bwa muntu mubi bukamunembelwa aye mwine.

Lumwekesho 1:18

Ne wa bumi: bino nafwile, kabiji tala, ne mumi wa myaka ne myaka, kabiji nji na bakii ba lufu ne ba Kalunga.

Yoano 11:43, 44

Byo aambile bino, wabijikile na jiwi jikatampe amba, Lazalasa, lupukaimo. Ponkapo aye wafwilé walupukilemo kasa akaswa kitambala. Ne Yesu wibambijile'mba: Mukasululai, ayenga.

Yoano 10:17, 18

Kyo kyo bantemenwa Batata, mambo amiwa ngela mweo wami,

namba nkamutambule jibiji. Ka paji uñangataye ne, pakuba namwela ami mwine. Nji na lūsa lwa kumwela, kabiji nji na lūsa lwa kumutambula jibiji. Uno mukambizho ye ye bankambizhizhe Batata.

Luka 7:14, 15

Wafwenyenye ne kwipi ne kukwata pa kintanzhi: ne aba bamusendelé baimene. Kabiji aye waambile'mba: Nsongwalume nakwambila namba: Buka. Ponkapo waji mufu wabukile ne kwikala, ka ambe ne kwamba, ne Yesu wamulubwile kwi inanji.

Mpitulukilo ya mu Mizhilo 5:7-21

Kechi mukekale na balesa bakwabo ba kubikapo pe amiwa ne.

Kechi mukesongole nkishi, nangwa kipashañano kya byepi kya kintu kiji mwiulu, nangwa kya kintu kiji pano panshi, nangwa kya kintu kiji mu mema aji pano pa ntanda ne; kechi mukebilambile panshi nangwa kwibingijila ne. . .

Kechi mukejitele jizhina ja YEHOPA Lesa wenu patutu ne; mambo aye YEHOPA kechi ukamuleka awa muntu watela jizhina janji patutu ne.

Kasa wijilama juba ja sabado, mu kwijizhijika, monka mo emu-

kambizhizhe YEHOPA. Muke-ngilenga mu moba atanu na jimo ne kuba mingilo yenu yonse: bino juba ja butanu na bubiji jo ja sabado kwi YEHOPA Lesa wenu.

Kasa munemeka bashenu ne bainenu monka mo emukambizhizhe YEHOPA Lesa wenu, namba moba enu akavule, mukamonenga byawamá mu kyalo kyo emupa aye YEHOPA Lesa wenu.

Kwipayañana ne.

Nangwa kuba bukende ne.

Nangwa kwiba ne.

Nangwa kumubepela mukwenu ne.

Nangwa kukumbwa muka mukwenu ne, nangwa nzubo ya mukwenu ne, nangwa bujimi bwanji ne, nangwa wa mwingilo wanji

KECHI UFYAME

Yoba 34:21, 22

Mambo meso anji aji pa mashi-nda a bantu, kabiji umona monse monse mo baya. Ka paji mfishi nangwa mfishi ikatampe mo bakonsha kufyama aba bóba byatamá ne.

Masalamo 139:8 ne 12

Nangwa nakanjila mwiulu, muji monka: nangwa naala mwanya wami mu Kalunga ka bafu, talai, muji monka. . . Kabiji mfishi kechi ifya bintu kují anweba ne, ne

wa mulume nangwa wa mukazhi ne, nangwa ñombe wanji nangwa mbongolo wanji nangwa kintu kya byepi kya mukwenu ne.

KWI LESA NE

21

bufuku nabo butoka nobe mute; bino mfishi ne kyeya byonse biji pamotu kují anweba.

Byambo bya Mana 15:3

Meso a YEHObA aji konse konse, saka atala pa batamá ne pa bawamá.

Luka 8:17

Mambo kafwako kyafyamiká kikabula kusololwa; nangwa kya ku mbaji kikabula kuyukanyika ne kusoloka.

22 BABI BAKATAMBULA LUKABISHO LWA MYAKA

Masalamo 9:17

Babi bakebalulwila mu Kalunga ka bafu, bo ba mu mikoka yonse bamuvulama Lesa.

Mateo 18:8

Kabiji kana kuboko kobe nangwa kulu kobe kwakutuntwisha, kuchibeko wikutaye: kyakuwamina kukatwela mu bumi na bulema bwa kuboko nangwa na kusunkuta; kyatama kutayiwa na maboko abiji nangwa na maulu abiji mu mujilo wa myaka.

Mateo 13:41, 42

Mwana muntu ukatuma bamalaika banji, bakebipwizha pamobintu byonse bya mu bufu-

mu bwanji bya kwituntulako, ne bonse bóba byatamá, ne kwibataya mu kisha kya mujilo: mo mukekala ne kujila ne kwisuma ku meno.

2 Petelo 3:7

Pakuba bya mwiulu bya katakata ne ntanda, byalaminwa mujilo ku aja jwi jimo jonka, kutengela juba ja kije ne ja lonaiko lwa bantu babulwá kwakamwa Lesa.

Mateo 25:46

Kabiji bano bakaya ku lukabisho lwa myaka: pakuba bauloká bakaya ku bumi bwa myaka.

Bahebelu 9:27

Kabiji byonka byo ebatongwela bantu kufwa jimo jonka, kabiji palutwe ke kuya ku kije.

Byubilo 17:31

Mambo aye watongola juba jo akebachibilamo mambo ba pano pa ntanda monka mu bololoke, konka ku yewa muntu ye atongola; kabiji byo akoba byonkabyo aye wibapa bonse kiyukilo kya kwibayukishakyo, byo amusangwile mu bafu.

1 Yoano 4:17

Monka muno mo bwalumbulukila butemwe mwi atweba, amba, twikale na kuchinchika mu juba

ja kije; mambo byonka byo aji aye mwine, byo byo tuji pano pa ntanda.

2 Petelo 2:9

Aye Nkambo wayuka kupokolola banemeká Lesa mu lwe-seko, ne kwibalama babulakoloka mu lukabisho, kupembela juba ja kije.

2 Kolinda 5:10

Mambo atweba bonse tuka-mweka konka ku kipona kya kije kya Kilishitu; amba bonse pa muntu pa muntu, tukatambule mfweto ya bintu bya mu mibiji, monka mo twaubile, nangwa byawamá nangwa byatamá.

Byubilo 4:33

Ne na bulume bukatampe batu-
mwa bashimwinenga mambo a
lusanguko lwa Nkambo Yesu: ne
bupe bukatampe bwaikajile pe
abo bonse.

Loma 9:16

Byonkabyo nanchi kechi o ma-
mbo a yewa usaka ne, nangwa a
yewa wingila ne, nanchi o ma-
mbo a lusa lwanji aye Lesa.

Loma 5:15

Bino nanchi akya kya bupetu
kechi kyayila mwayilá muzhilu-
lwila ne. Mambo umvwe bavulá
bafwile na muzhilulwila wa umo,
kine kabiji bupe bwa Lesa, ne
kyo apana mu bupe, bwa yewa

muntu umo, Yesu Kilishitu, bya-
kijishatu kwibakumbana bavulá.

2 Kolinda 9:15

Sante ekale kwi Lesa na ma-
mbo a kya bupe kyanji kyabulwá
ne mwa kwikitelela.

1 Petelo 5:5

. . . Lesa wibakanya betóta, bi-
no upana bupe ku bepelúla.

2 Kolinda 8:9

Mambo mwayuka bupe bwa
Nkambo yetu Yesu Kilishitu,
amba, nangwa wajinga munonshi,
byonkabyo na mambo a anweba
waalukile ke muyanji, amba,
anweba monka mu buyanji bwa-
nji mwaluke ke banonshi.

Byubilo 17:30

Kabiji aya myaka ya bulubi aye Lesa walekayo; pakuba pano ubenakukambizha bantu bonse konse konse amba balapile.

Byubilo 3:19

Byonkabyo lapilai, ne kwaluluka, mambo enu azhimañane, kukeye myaka ya kubwezha michima ifúma ku meso a Nkambo.

Mateo 3:2

Lapilai; mambo bufumu bwa mwiulu bwafwenya ke pepi.

2 Kolinda 7:10

Mambo bulanda bwa mwayilá bwina Lesa bwingijila lulapilo lu-

léta lupulukilo, lo lulapilo lubúla kuleta kinyenge: pakuba bulanda bwa pano pa ntanda bwingijila lufu.

Luka 13:3

Amiwa namba: Ine: pakuba ne anweba, umvwe ne kulapila ne, bonse mukonaika pamo byonkabyo.

Ezikiyo 18:31

Tayai mizhilulwila yenu yonse yo mwazhilulula kwi amiwa; kebai bonse pa muntu pa muntu muchima mupya ne mupashi mupya. Mambo ka o musakila kufwa anweba ba mu kisaka kya Isalela?

Mateo 6:14

Mambo umvwe mwibalekelako bantu mambo abo, ne Shenu wa mwiulu naye ukemulekelako ne mambo enu pamo.

Ezikyó 18:21

Pakuba umvwe aye mubi waleka bubi bwanji bonse bo aubilenga, ne kulama malamuna ami onse, kasa oba bya mwayilá mizhilo, byonka byaoloká, kine ukekala na bumi, kechi ukafwane.

Isaya 55:7

Mubi aleke jishinda janji, ne yewa wabulá koloka aleke milanguluko yanji; abwele kwi YE-

HOPA, ne aye ukamubila lusa; abwele kwi Lesa wetu, mambo aye ukamulekela mambo anji onsetu.

Byubilo 5:31

Aye uno yenka Lesa wamutumbijikile na kuboko kwanji kwa kilujo amba, ekale Mfumú ne Mupulushi, ebape bena Isalela lulapilo ne lulekelo lwa mambo.

Lumwekesho 3:20

Tala, naimana ku kibelo kasa nkokaula: umvwe muntu wau-mywa jiwi jami ne kunshinkwilako, amiwa nkatwela mo aji ne kuja nanji, ne aye ne amiwa.

KWABANA NA BYA PANO PA NTANDA 27

Kolose 3:2

Teshai michima yenu ku bintu bijí mwiulu, kechi ku bintu bijí pano pa ntanda ne.

Isaya 1:16

Owai; itokeshai; fumyai bubi bo muba ku meso ami; kilekai kuba byatamá.

1 Yoano 2:15, 16

Inge mutemwe pano pa ntanda nangwa bya pano pa ntanda ne. Umvwe muntu watemwa pano pa ntanda, butemwe bwa kute-mwa Tata kechi buji mwi aye ne. Mambo byonse bijí pano pa ntanda, lwisó lwa mubiji, ne lwisó

lwa meso, ne kwitota kwatu kwa buno bumi, kechi byo bya Tata ne, nanchi byo bya pano pa ntanda.

Efisesa 5:11

Kabiji kechi mumvwañane nayo mingilo yatu ya mfishi ne, poso konka kwibilengulula.

Titusa 2:11, 12

Mambo bupe bwa Lesa bwa-mweka, bwaleta lupulukilo ku bantu bonse, bwitufunda atwe-ba'mba, tukanenga bumbulwa kwakamwa Lesa ne bya lwisó lwa pano pa ntanda, twikale ba-tekanyá, ne baoloká, ne ba kune-meka Lesa pano pa ntanda.

1 Petelo 1:23

Byo mwasemwa jibiji, kechi ku lukunwa ubóla ne, poso ku ubúla kubola, monka mu mambo a Lesa, ají na bumi ne kwikala aikala myaka.

Yoano 3:3

Kumvwa Yesu amba: Kine, kine, nemwambila namba, inge muntu ne kusemwa jibiji ne, kechi akonshe kumona bufumu bwa Lesa ne.

2 Kolinda 5:17

Onkao mambo umvwe muntu uji mwi Kilishitu, aye ke mulengwa mupya: bintu bya kala bya-pichijila; talai, byaaluka ke bipya.

1 Yoano 5:18

Twayuka namba: Kafwako wasemwá kwi Lesa ulengalenga mambo ne; pakuba Aye wasemwá kwi Lesa umulama ne aye mubi kechi amube kintu ne.

1 Yoano 2:29

Umvwe mwayuka'mba, aye ye waoloká, mwayuka'mba, bonse bóba bololoke bo basemwa kwi aye.

Ezikyó 36:26

Nkemupa muchima mupya, ne kubika mupashi mupya mwi anweba, nkafumyamo michima ya bujibwe mu mibiji yenu, ne kwimupa michima yanekená.

KUFWILA KU BUBI — NE KWIKALA NA MWEO KWI LESA

29

Kolose 3:1

Kabiji umvwe mwasangwilwe pamo ne Kilishitu, kebai bijí mwiulu, monka muji Kilishitu, kasa aikala ku kilujo kya Lesa.

1 Petelo 2:24

Mwine ye wasendele mambo etu mu mubiji wanji konka ku kichi, amba atweba byo twafwile ku bundengamambo, twikale monka mu bololoke; ko ku bipumo byanji ko mwabukijilwe.

Loma 6:2 ne 11

Atweba twafwilé ku bundengamambo tukikalemo byepi? . . . Byonkabyo ne anweba mwafwai-

nwa kulanguluka amba, twi bafu ku bundengamambo, kabiji twi bomi kwi Lesa mwi Yesu Kilishitu.

Ngalatiya 5:24

Kabiji abo ba kwa Kilishitu Yesu bapopa kala pa musalabu buntunshi bwabo ne bya kusakasaka kwabo ne bya lwiso lwabo byonse pamo.

Efisesa 2:1 ne 6

Ne anweba wimusangwile ke bomi, byo mwajinga bafu na mambo a mizhilulwila yenu ne mambo enu. . . ne kwitubusha pamo ne aye, ne kwitwikazha pamo ne aye mwiulu, mwi Kilishitu Yesu.

Yoano 3:14, 15

Kabiji byonka byaimikilé Mosesa mulolo mungyetu, byo kya-fwainwa ne Mwana muntu ake-mikwe byonkabya; amba bonse bamwitabila bekale na bumi bwa myaka.

Loma 6:23

Mambo mfweto ya bundenga-mambo lo lufu; pakuba kya bupe kyo apanatu Lesa bo bumi bwa myaka mwi Yesu Kilishitu, Nkambo yetu.

Ngalatiya 6:8

Mambo awa ubyajila buntu-nshi bwanji mwine ukanowa bu-bole konka ku buntunshi; kabiji

awa ubyajila Mupashi ukanowa bumi bwa myaka konka ku Mupashi.

Yoano 3:36

Aye wamwitabilá Mwana ye uji na bumi bwa myaka; pakuba aye ubúla kukokela Mwana kechi akamone bumi ne, ne bukaji bwa Lesa bwaikala pe aye.

Yoano 5:24

Kine, kine, nemwambila namba: Aye waumvwa mambo ami, ne kumwitabila aye wantumá uji na bumi bwa myaka, kechi ukeya mu kije ne, pakuba mu lufu wafumamo, wapitaila ku bumi.

Ngalatiya 4:6

Kabiji byo muji bana, Lesa watuma Mupashi wa Mwananji mu michima yenu, kasa eta'mba: Abba, Tata.

Isaya 32:17

Kabiji bololoke bukaleta mutende, ne bwikalo bwazhindamatu nzo, ne luketekelo lwa myaka ne myaka.

1 Yoano 3:18, 19

Anweba twana, kechi tutemwe na byambo byonka, nangwa na lujimi yenka ine; poso mu byubilo ne bukine.

Yoano 14:21

Awa uji na mikambizho yami ne kwiilama, ye wantemwa; ne awa wantemwa ye bakatemwa kwi Batata, ne amiwa nkamutemwa, ne kwimweshwa ami mwine kwi aye.

Loma 8:16

Aye Mupashi mwine ushimuna pamo ne mipashi yetu, amba twi bana ba Lesa.

1 Yoano 4:13

Monka muno mo twayukila namba, twaikala mwi aye ne aye naye mwi atweba, mambo witu pa Mupashi wanji.

KILISHITU UJI MWI ATWEBWA, WITUPA LUSEKELO

Yoano 17:13

Pakuba pano ngiya kwi anwebwa; kabiji bino nebyamba pano pa ntanda, namba, bekale ne lusekelo lwami kasa lwafikila mu mitchima yabo.

Loma 14:17

Mambo bufumu bwa Lesa kechi buji mu bya kuja nangwa mu bya kutoma ne, poso mu bololoke ne mutende ne lusekelo mwi aye Mupashi Wazhilá.

Ngalatiya 2:20

Napopelwe pa musalabu pamo ne Kilishitu; kabiji amiwa kechi nakikala na bumi ne, kana Kilishitu ye waikala na bumi mwi

amiwa; kabiji ne abwa bumi bo naikala nabo pano mu mubiji, naikala nabo monka mu lwitabilo lwa mu Mwana Lesa, yenkaye wantemenwé ne kwipana wipaine mwine na mambo a amiwa.

Masalamo 16:11

Mukambula jishinda ja bumi: mu kyenyi kyenu muji lusekelo lwavujishá; ku kuboko kwenu kwa kilujo kuji bya lusekelo myaka ne myaka.

Yoano 15:11

Bino bintu nebyamba kwi anwebwa, namba lusekelo lwami lwikale mwi anwebwa, kabiji namba lusekelo lwenu lulumbuluke.

TWAFWAINWA KUKOKELA YEHOPA LESA 33

Mpitulukilo ya mu Mizhilo
11:26-28

Umwai, lelo jino namwasha ku meso enu mapesho ne mafingo: ke mapesho umvwe mwakokela mikambizho ya YEHOPA Lesa wenu yo mbenakwimukambizha ja lelo, kabiji ke mafingo umvwe mwabula kukokela mikambizho ya YEHOPA Lesa wenu.

2 Tesalonika 1:7-9

Ne kwimulubwila anweba mumóna bya malwa kya kukokoloka pamo ne atweba, pa lumwekesho lwa Nkambo Yesu, byo akafuma mwiulu na bamalaika ba bulume bwanji mu mujilo

utéma, kasa ashinkanya nabo babulá kuyuka Lesa, ne abo babulá kukokela mambo awamá a Nkambo yetu Yesu: bo bakamona lukabisho lwa lonaiko lwa myaka lwa kupangwa ku kilungikya Nkambo ne ku lukumo lwa bulume bwanji.

Loma 6:16

Nanchi kechi mwayuka'mba ko mwipana anwe bene buzha mu kumukokela, kwapwa mwi bazha banji ye mukokela; nangwa mwi ba bundengamambo bwa kumwenamo lufu, nangwa mwi ba lukokelo lwa kumwenamo bololoke?

1 Yoano 2:23

Aye ukána Mwana, ne Tata kechi uji nanji ne: aye witabila Mwana, ye uji ne Tata pamo.

Mateo 10:32, 33

Byonkabyo awa ukangitába ku meso a bantu, ne amiwa nkamwita ku meso a Tata wa mwiulu. Kabiji awa ukankána ku meso a bantu ne aye naye nkamukana ku meso a Tata wa mwiulu.

Loma 10:9, 10

Pakuba umvwe witabe pa kawnwa kobe amba: Yesu ye Nkambo, ne kwitabila mu muchima wobe amba: Lesa wamusangwile

mu bafu, ukapuluka; mambo na muchima muntu witabila ne kumona bololoke; kabiji na kanwa nako witabila ne kumona lupulukilo.

Luka 9:26

Mambo awa ukangubíla bumvu amiwa ne mambo ami, ne aye naye ye ye akobila bumvu Mwana muntu, byo akeya mu lukumo lwanji mwine, ne lwa Shanjji, ne lwa bamalaika bazhilá.

Filipai 2:11

Ne majimi onse aketabe'mba: Yesu Kilishitu ye Nkambo, mu kumuletela lukumo Lesa Tata.

SATANA — YE MULWANYI WETU WATAMISHÁ 35

Byubilo 26:18

Mu kwibalabisha meso abo, bavundamine ku mfishi, balulukile ku kyeya, kabiji bavundamine ku lūsa lwa Satana, balulukile kwi Lesa, batambule lulekelo lwa mambo, ne buswanyi mwi abo bazhijikwá na lwitabilo lwa mwi amiwa.

Mateo 4:1 ne 10, 11

Ponkapo Yesu bamutwajile kwi Mupashi mungyetu amba bamwe-seke kwi Diabola. . . Kumvwa Yesu wamwambile'mba: Fumako, Satana: mambo kyanembwa'mba: Ukamupopwela Nkambo

Lesu wobe ne kumwingijila aye yenka. Ponkapo Diabola wamulekele; kabiji ponkapo bamalaika baishile, ke bamwingijile ne kumwingijila.

Efisesa 6:11

Vwalai byonse bya nkondo bya Lesu, namba mukonshe kwimana saka mwakosa ku bya bujimuku bya Diabola.

1 Petelo 5:8

Tekanyai, mulabenga ne kuke-nkenta: mulwanyi wenu Diabola, nobe bokwe wimba, upitañana na kusaka ye ayuka kuja.

1 Yoano 3:8

Aye ulengalénga mambo ye wa Diabola; pakuba aye Diabola ye ulengalenga mambo ne ku ntendekelo. Onka ano mambo o bamumwesheshe Mwana Lesa, amba, onaune mingilo ya Diabola.

Loma 8:35 ne 37

Nanyi uketwabánya na butemwe bwa Kilishitu? bya malwanyini? nangwa buyanjinyi? nangwa lupatonyi? nangwa nzalanyi? nangwa bwambanyi? nangwa mu bya lufunyi? nangwa mpokonyi? Ine, mu bino bintu byonse twa-

kila mu kushinda monka mwi aye witutemwá.

Yakoba 4:7, 8

Byonkabyo nekenenai Lesa; pakuba Diabola mukanyai, ne aye ukemunyema. Fwenyai kwipi ne Lesa, kabiji ne aye ukafwenya kwipi ne anweba.

Bahebelu 2:14

Mambo bana byo batambula bonse mibiji ya mashi, byonkabyo ne aye naye watambwile wa byonkabyo; amba monka mu lufu amuvulañanye ke watu awa wajinga na bulume bwa lufu, ko kuba'mba: Diabola.

1 Kolinda 13:1

Nangwa namba na njimi ya bantu ne ya bamalaika, umvwe ne kwikala ne butemwe ne, naaluka ke nobe lubemba uvúma, nangwa lusonsolo ubátu nge nge nge.

1 Yoano 3:14

Twayuka namba, mu lufu twafumamo twapitaila ku bumi, mambo twibatemwa bakwetu. Awa ubúla kutemwañana waikala mu lufu.

1 Yoano 4:20

Umvwe muntu waamba'mba: Natemwa Lesa, kasa ashikwa mulongo wanji, ye wa bubela: mambo awa wabulá kutemwa

mulongo wanji ye amona, kechi akonshe kutemwa Lesa ye abúla kumona ne.

Ngalatiya 5:22, 23

Pakuba bipangwa bya Mupashi bo butemwe, ne lusekelo, ne mutende, ne kukoka muchima, ne lusa, ne buwame, ne buki-shinka, ne bukimote, ne kwikanya.

Yoano 21:16

Kabiji aye wamwambile ke jibiji amba: Shimona mwana Yona, wantemwanyani? Kumvwa aye amba: Ee, Nkambo; anweba mwayuka byo nemutemwa. Ne aye Yesu wamwambile'mba: Kalamai mikoko yami.

Byubilo 10:39-41

Ne atweba twi batumonyi ba byonse byo aubilenga ne mu kya-lo kya bena Yudea, ne mu Yelusalema; ye ye baipayile, byo bamupopele pa kichi. Pakuba Lesa wamusangwile mu juba ja busatu, ne kumusolola'mba amweke ku bantu, kechi ku bonsetu ne, kana ku bonka batumonyi bo asalulwijile jimo mwine Lesa, ye atweba, twajilé ne kutoma nanji, byo asangukile mu bafu.

Yoano 20:26-28

Kabiji pa kupita moba atanu na asatu, bana banji ba bwanga bajinga mu nzubo jibiji, ne To-

mase naye wajinga nabo. Ne Yesu waishile, bibelo kasa bebishinka, ne kwimana waimene mukachi, ne kwamba'mba: Mutende kwi anweba. Ponkapo wamwambile Tomase amba: Letai munwe wenu kuno, mutale mu maboko ami, mulete ne kuboko kwenu, mukule mu mbavu yami: kechi mwikale wabulá lwitabilo ne, mwikale wa lwitabilo. Kumywa Tomase wamwambile'mba: Nkambo yami ne Lesa wami.

Loma 4:25

Ye wasolwelwe pa mambo etu, ne kusangulwa wasangwilwe mambo a kubingishiwa kwetu.

LUSANGUKO LWA YESU LWITULETELA LUKUMO 39

Mateo 16:21

Kufumya pa kyonkakya kimye Yesu watatwile kwibafunjisha banna banji ba bwanga'mba: Kyamfwainwa amiwa nkaye ku Yelusalema, nkamaname na bya malwa byavulá ku bakulumpe ne ku bañanga bakatampe ne ku banembeshi, ne kungipaya bakangipaya, kabiji mu juba ja busatu nkasangulwa.

Yoano 5:25 ne 28, 29

Kine, kine, nemwambila namba: Juba jibenakwiya, ne pano jafika kala, po bakomvwa bafu jiwi ja Mwana Lesa; ne abo bakomvwá bakekala na bumi. . . Kange mukumye kyo kino ne:

mambo juba jibenakwiya, jo bakomvwa bonse bají mu bilende jiwi janji, kepo bakafumamo; baubilénga byawamá, ku lusanguko lwa bumi; aba baubilénga byatamá, ku lusanguko lwa kije.

Loma 6:3-5

Nanchi mwalubanyi, amba, anweba bonse twabatizhilwá mwi Kilishitu Yesu, twabatizhilwe mu lufu lwanji? Byonkabyo twazhikilwe nanji mu lufu monka mu lubatizhilo: amba byonka byo asangwilwe Kilishitu mu bafu ku lukumo lwa Shanji, byonkabyo ne atweba twendenga mu bumi bupya. Mambo umvwe twaaluka

kala ke twanungakana nanji mu kipasha kya lufu lwanji, kabiji

40 KWIKALA BAZHILÁ KU MESO A NKAMBO

2 Kolinda 7:1

Onkao mambo anweba batemwe, byo tuji ne milaye ino, twitokeshe atwe bene ku bubipisho bonse bwa mubiji ne bwa muchima, kasa tulumbu-lula buzhile bwetu mu moyo wa kwakamwa Lesa.

2 Timoti 2:21

Byonkabyo inge muntu witokeshá mwine ne kwifumya ku bi-bye, ukekala ke kijilo kya mwingilo wa mushingi, kyazhijikwá, kyafwainwá kwingilako Nkambo

byonkabyo tukekala ne mu kipasha kya lusanguko lwanji.

kiiwamina jimo mingilo yonse yawamá.

1 Petelo 1:15

Bino monka mwaikajila wazhilá aye wimwitá, monkamo ne anweba nenuwa mwikale bazhilá mu misango yonse ya bwikalo bwenu.

Luka 1:74, 75

Lwa kwitupa atweba, twikale bapokololwa mu kuboko kwa balwanyi betu, tukamwingijilenga kwa kubula moyo, monka mu buzhile ne mu bololoke ku meso anji moba onsetu a myeo yetu.

Bahebelu 13:12

Byonkabyo ne Yesu naye, byo asakile kwibazhijika bantu na mashi anji mwine, wamanamijile pangye ya nkambi.

1 Yoano 1:9

Umvwe twisolola mambo etu, aye ye wa kishinka ne koloka mu kwitulekela mambo etu, ne kwitutokesha ku bumbulwakoloka bonse.

Mateo 3:11

Amiwa kine nemubatiza mu mema, lubatizhilo lwa lulapilo: pakuba awo undondéla mu nyuma yami wankila bulume, amiwa kechi nafwainwa kumusendela

makwabilo anji ne: aye ukemubaliza mu Mupashi Wazhilá ne mu mujilo.

Efisesa 1:4

Monka mo etusalulwijile mwi aye pano pa ntanda kasa pa kyangye kulengwa, amba twikale bazhilá, babulá bulema ku meso anji mu butemwe.

Isaya 35:8

Kabiji mu kiselebwa mukekala mukwakwa, ye bakatela'mba: Mukwakwa wazhilá; aba bezhilululá kechi bakapitamo ne. Ukekala ke wa kwendamo bantu banji; aba bakapítangamo, nangwa babula mana, kechi bakalubamo ne.

Luka 11:13

Kabiji umvwe anweba, byo muji babi, mwayuka kupana byawamá ku bana benu, nanchi aye Shenu wa mwiulu kechi emukile kupana Mupashi Wazhilá ku bamulomba nenyi?

Ezikiyo 36:27

Nkabika Mupashi wami mwi anweba, ne kwimulengela kwennda monka mwayila malamuna ami, ne kulama na muntsha byatongolwa byami ne kwibyuba.

Byubilo 1:8

Pakuba anweba mukatambula bulume, byo akemwikijila Mupashi Wazhilá: kepo mukekala batumonyi bami ba kunshimuna.

Byubilo 4:31

Ponkapo byo balombele, ne momwa mo bapwijile mwasunkenne; ne bonse bayujile ne Mupashi Wazhilá, ke bambetu mambo a Lesa na kuchinchika.

Byubilo 13:52

Ponkapo bana ba bwanga bayujilenga na lusekelo ne Mupashi Wazhilá.

Loma 8:9

Pakuba anweba kechi muji mu buntunshi ne poso mu Mupashi, umvwe Mupashi wa Lesa waikala kine mwi anweba. Kabiji umvwe muntu wabulwá Mupashi wa Kishitu, kechi ye wa kwanji ne.

MILAYE YA KUKUMYA YALAYILWA BENA KILISHITU

43

Masalamo 34:18

YEHOPA uji kwipi na bonse balajiká michima, kabiji wibapulusa bonse ba mipashi yalapilá.

Lumwekesho 21:4

Kabiji aye ukashimuna mipolo yonse ku meso abo; ne lufu kechi lukekalako jibiji ne; nangwa mabingo, nangwa kujila, nangwa misongo, kechi bikekalako jibiji ne; bintu bitanshi byapichijila.

Isaya 66:2

Kabiji bino bintu byonse kuboko kwami ko kwibilenga, onkao mambo o byamekejile byonse,

byo byaamba YEHOPA. Bino awa muntu ye nkatala bulongo amiwa, ye yenkawa wipelúla ují na muchima walajiká, yenka uzakáma pa kumvwa byambo byami.

1 Petelo 4:12, 13

Anweba batemwe, kechi mukumye alwa lweseko lwa mujilo lují mwenu, lwaiya mu kwimweseke, nobe kintu kingi kimufikilatu ne: pakuba byo muji bakumona nanji bya kumanama byanji Kilishitu, sekelai; namba, ne ponka pa lumwekesho lwa lukumo lwanji napo, mukasekele na lusekelo lukatampe.

Loma 8:28

Kabiji twayuka namba bintu byonse bingila pamo mu kwibale-tela byawamá batemwá Lesa, bo boba baitwá monka mwayilá ku-fukula kwanji.

Bahebelu 2:18

Mambo byo amanamine mwi-ne pa kwesekwa, aye wakonsha kwibakwasha baesekwá.

Masalamo 34:19

Byamalwa bya waoloká byo byavula; kabiji YEHOBA umu-pokolola mu byonse.

1 Kolinda 10:13

Kafwako lweseko lwimufikila lo babula kumona bantu bonse ne: mambo Lesa ye wa kishinka,

kechi akemuleke'mba, mumone lweseko lwakila pa bulume bwe-nu ne: bino mu lweseko ukemu-mwena ne jishinda ja kupuluki-lamo, amba mumone mwa kwi-lukonshesha.

Isaya 43:2

Byo mukapita mu mema, nke-kala nenu; kabiji ne pa kupita mu mikola kechi ikemulobezha ne; kabiji ne byo mukapita mu mu-jilo kechi mukapya ne, ne lube-be lwa mujilo kechi lukemusoka ne.

Loma 16:20

Ne aye Lesa wa mutende uka-muchakakanya Satana munshi ya maulu enu palutwe kacheche.

Lumwekesho 3:5

Aye ushinda ukavwala bivwalo bitoka; ne amiwa kechi nka-zhimañanya jizhina janji mu buku wa bumi ne, kabiji nketaba jizhina janji ku meso a Batata ne ku meso a bamalaika babo.

Lumwekesho 3:12

Aye ushinda, nkamwalula ke jipanda ja mu nzubo yazhilá ya Lesa wami, kabiji kechi ukalupukamo jibiji ne: ne amiwa nkanemba pe aye jizhina ja Lesa wami, ne jizhina ja muzhi wa Lesa wami, ye Yelusalema mupya, afuma mwiulu kwi Lesa wami, ne jizhina jami jipya.

Lumwekesho 2:7

Awa ují na matwi, omvwe byámba Mupashi ku bipwilo, Kwi aye ushinda nkamupa namba ajenja ku kichi kya bumi, kijí mu Paladisa ya Lesa.

Lumwekesho 21:7

Aye ushinda ukaswana bino bintu; ne amiwa nkekala ke Lesa wanji, ne aye naye ukekala ke mwanami.

Lumwekesho 3:21

Aye ushinda, amiwa nkamupa namba ekale ne amiwa pa jitanda jami, monka mo nashinjile ne amiwa, ne kwikala naikala ne Batata ponka pa jitanda jabo.

LESA WITUBULA NA MAMBO A KWIKANA MASONGOLA

1 Kolinda 7:10, 11

Kabiji ku bají mu masongola, nakambizha, kine kechi amiwa ne, kana aye Nkambo, namba: Mwanamukazhi kechi abane ne mulume wanji ne (bino umvwe waabana nanji, ekaletu ne kusingolwa ne, kana abwele konka kumwata wanji); kabiji amba, ne mulume naye kechi abane ne mukazhanji ne.

Loma 7:2, 3

Mambo mwanamukazhi ují na mwata wanji wakaswa na muzhilo ku mwata wanji byo akiji mumi; pakuba umvwe mwata wanji

wafwa, wakasululwa ku muzhilo wa mwata wanji. Kabiji byonka-byo, umvwe wasongolwa ku ungi, mulume kasa akiji mumi, abyo bakamutela'mba, nkende: kabiji umvwe mwata wanji wafwa, abyo wakasuluka ku muzhilo, kechi ukekala nkende ne, nangwa wasongolwa ku mulume ungi.

Mateo 5:32

Pakuba amiwa nemwambila namba, awa ukána mukazhanji, pa kubula mambo a bukende, wamulenga ke nkende: ne aye wamusongolá awa ye bakana naye wauba bukende.

KWIYA KWA BUBIJI KWA YESU KILISHITU 47

Mateo 24:27, 28

Mambo byonka byuba kubesha kwa mvula kufuma ku musela ne kumweka ku muzhika; byo kikekala ne pa kwiya Mwana muntu. Paji mubiji wafwa po ponka pakapwila makubi.

Lumwekesho 3:11

Abo ngiya bukiji: kwachisha akya kyo uji nakyó, namba káfwo nangwa umo akwangate munchinya wobe ne.

Mako 8:38

Mambo aye ukangubila bumvu amiwa ne mambo ami mu kino kisemi kya bukende ne kya bundengamambo, ne Mwana muntu

naye ukamubila bumvu byo akeya mu lukumo lwa shanji na bamalaika bazhila.

Mateo 24:30

Kabiji ponkapotu kikamweka kiyukilo kya Mwana muntu mwiulu: kabiji mikoka yonse ya pano panshi iketamina, bakamumona ne Mwana muntu sa eya mu makumbi a mwiulu na bulume ne lukumo lukatampe.

Yoano 14:3

Kabiji inge naya na kwimuwena kuntu, nkeya jibiji, ne kwimutambula kwami ami mwine; namba akwa ko nji amiwa, ne anweba mukekale konka.

48 KWIYA KWA BUBIJI KWA YESU KILISHITU

Byubilo 1:11

Ne kwamba'mba: Anweba be-na Ngalilea, mambo ka o mwai-mena ne kutala mwiulu? uno Yesu, watambwilwá mwiulu kufuma kwi anweba, ukeya pamo byonkabi byo mwamumona kasa aya mwiulu.

Mateo 16:27

Mambo Mwana muntu ukeya mu lukumo lwa Shanji na bama-laika banji; po po akafweta ku muntu ku muntu monka mwayila mingilo yabo.

1 Yoano 3:2

Anweba batemwe, ponka pano twi bana ba Lesa, kabiji kikya-

ngye kumweka byo tukekala. Twayuka namba, pa kukamweka aye, tukapashañana nanji; mambo tukamumona byonka byo aji.

Luka 12:40

Ne anweba nenuwa tengelai: pakuba Mwana muntu ukeya po mwabujila kuketekela.

Lumwekesho 16:15

Talai, amiwa ngiya nobe ngivi. Watokwa awa ulaba ne kukenkenta ne kulama bivwalo byanji, kuchina'mba wakendanga bwamba, ne bantu bakamona bumvu bwanji.

MAMBO A LESA

Byambo byenu ye lampi wa mau lu ami, kyo kyeya kya mu jishinda jami.

—Masalamo 119:105

Byambo byenu nebifya mu muchima wami, namba: Kechi nkemulenge mambo ne.

—Masalamo 119:11

Kumvwa Yesu amba, Mwaya mungi, mambo kechi mwayuka binembelo ne, nangwa bulume bwa Lesa ne.

—Mateo 22:29

Binembelo byonse byanembeshiwa kwi Lesa, kabiji byo byawamina mu kwibafunjisha bantu, ne mu

kwibalengulula ne mu kwibolola, ne mu kwibafunda mu bololoke.

—2 Timoti 3:16

Jiulu ne ntanda bikapita: pakuba byambo byami kechi bikapite nangwa kacheche ne.

—Luka 21:33

Mambo bya bungauzhi kechi byaishilepo na kyswa muchima wa muntu nangwa jimotu ne, bino bantu baambile byafuminé kwi Lesa, monka mo bebatwajile-twajile ku Mupashi Wazhilá.

—2 Petelo 1:21

Text reprinted from the Bible in Kaonde by permission of United Bible Societies Africa Regional Centre, Nairobi, Kenya.

Published in numerous languages by World Missionary Press as God supplies funds in answer to prayer. If you would like more copies for careful distribution, write in English to:

World Missionary Press, Inc.
P.O. Box 120
New Paris, IN 46553-0120 USA